

PAGTULON-AN 13 — SI JOSUE MAO ANG NAGPANGULO  
PAINGON SA YUTANG GISAAD  
(Josue 1-11)

**KATUYOAN:** Sa pagpakita nga ang panalangin mabatonan sumala sa mga gisaad sa Pulong sa Dios.

Andamon nato ang atong mga espada ug taming kay moas-dang kita sa gubat samtang magapanaw kita dinhi sa DALAN SA SAAD. Imong masayran ang mga paagi unsaon sa pagbaton ug pagpahimulos sa tanang panalangin ingon nga usa ka Cristohanon.

Si Moises, ang matinumanon nga sulogoon sa Dios, namatay na ug ang Dios mao ang naglubong kaniya. Ingon nga bag-ong pangulo, si Josue, mao ang gitudlo nga maoy mangulo sa mga Israelitas ngadto sa YUTANG GISAAD, si Josue mao ang gipili tungod kay gipakita ang iyang pagtoo didto sa Kadeshbarnea sa dihang ang mga dili matinoohon nga mga maniniid nangahadlok nga moadto sa pagpanag-iya sa yuta. Sulod sa 40 ka tuig sa ilang paglibudlibud silang tanan nga mga talawan ug dili matinoohon, nangamatay ug si Josue ang gipili nga maoy mangulo sa bag-o nga kaliwatan (ilang mga anak) aron sa pag-angkon sa maong yuta. Ang Dios nakigsulti kang Josue ug naghatag ug mga saad.

a. Ang tanang dapit nga pagatumban sa lalalapa sa inyong tiil kana gihatag ko kaninyo, Josue 1:3.

b. Ingon nga ako nag-uban kang Moises, mao man magauban ako kanimo . . . Josue 1:5.

c. Magmauswagon ka kon dili nimo pag-ibulag kining basahona sa kasugoan sa imong baba, Josue 1:7-9.

Atong namatikdan nga ang kadaugan nagasandig lamang sa pagkamatinumanon ni Josue sa pagtuman sa basahon sa kasugoan.

Ang unang siyudad nga ilang giasdang mao ang Jerico, si Josue nagpadala ug mga maniniid ngadto sa maong siyudad. Ang

mga maniniid miabut sa panimalay ni Rahab ug siya nagluwas kanila sa kamatayon. Ilang gisaaran si Rahab nga siya ilang pagaluwason usab kon magbitay siya ug pula nga pisi diha sa bintana, Josue 2:21.

Ang ikaduhang kadaugan nila mao ang paglabang sa mga Israelitas sa suba sa Jordan. Gipugngan sa Dios ang tubig sa Jordan ug sila nakalabang sa yutang mamala sa maong suba, Josue 3:17.

Ang ikatolong kadaugan mao nga sila gihatagan ug sumbanan aron mabuntog ang Jerico sumala sa mabasa sa kapitulo 6 sa Josue.

Ilang gilibutan ang siyudad sumala sa gipahibalo kanila. Sa ikapito nga adlaw ang mga sacerdote nanagpatunog sa ilang mga trumpeta ug ang kota sa Jerico nagun-ob ug nahapla, Josue 6:20.

Dili ba kini katingalahang paagi sa pagdaug sa gubat? Ang mga tawo sa Jerico nagtoo nga ang mga Israelitas nangaboang samtang nagalibut-libut sila sa siyudad. Ang Dios nagpasabut kanato nga ang Iyang mga dalan ug hunahuna dili atong mga hunahuna. Iyang gihimo kining mga butanga aron Siya ang napasidungan ug dili ang tawo. Atong susihon kining pipila ka mga butang.

a. Unsay nakapahugno sa kota sa Jerico? Ang pagtoo sa Dios ug pagkamatinumanon sa Iyang mga kasugoan nga mao ang Iyang mga Pulong.

b. Unsay nakaluwas ni Rahab? Ang pagtoo sa Dios ug pagkamatinumanon sa Iyang mga pulong nga gipahimangno pinaagi sa Iyang mga sinugo nga maniniid, Hebreohanon 11:31.

c. Unsay nakapahimo ni Josue nga malampuson? Ang pagtoo sa Dios ug sa Iyang dili makita nga mga pagmando. Iyang napamatud-an ang iyang pagtoo pinaagi sa pagtuman sa mando sa iyang pangulo nga mao ang Dios. Ang Pulong wala mobiya kaniya. Siya misalig ug nagtuman bisan tuod ang mga sugo daw mga malisud usahay.

d. Unsay makadala kanato ngadto sa kalampusan nga ania manimuyo sa **LANDIGANAN SA GRASYA**? Aduna usab kitay gubat nga pagaasdangon ug "Dapit nga gisaad," nga atong pag-iyahon samtang magapanaw kita sa **MATAAS NGA DALAN SA KINABUHI**. Atong susihon kining pili ka mga butang mahitungod sa atong pakiggubat.

(1) Ang "dapit nga gisaad" kanato — espiritohanong panalangin diha sa mga langitnong dapit, Efeso 2:6-7.

(2) Ang atong kaaway — batok sa dautan ug mangitngit nga espirituhanong panon ug gahum diha sa mga langitnong dapit, Efeso 6:11-12.

(3) Ang atong kadaugan mabatonan lamang pinaagi sa pagtoo sa Pulong sa atong pangulo, ang Ginoong Jesu-Cristo. Atong mapamatud-an ang atong pagtoo pinaagi sa pagtuman sa Iyang Pulong, ang Biblia. Ang Dios nagsaad nga inatag ang tanan natong gikinahanglan nga maoy makapahimo nato nga malampuson sa pagkinabuhi nga Cristohanon. Diha kang Cristo atong mabatonan ang tanang espirituhanong mga panalangin sama sa kalipay, pakigdait, kalinaw, kaalam. Ang atong kaaway naninguha sa pagbabag kanato aron dili kita makapahimulos niining mga butanga apan kon may pagtoo kita sama ni Josue ug maninguha sa pagpanag-ya sa gisaad sa Dios, ang Dios matinumanon gayud nga mohatag niining tanan kanato.

Ikasubo nato isulti, human matumpag ang Jerico, ang nasud Israel wala gayud makapanag-ya sa tibuok nga yuta sa Canaan tungod kay wala nila tumana sa hingpit ang Pulong sa Dios. Nakaabut sila sa maong yuta ug ila nga gibahinbahin pinaagi sa ripa sumala sa gitugon sa Dios.

Dili ka pa ba luwas karon? Kon wala pa ikaw maluwas sama ikaw ni Rahab nga nagpuyo sa siyudad sa Jerico nga naga-ungaw sa pagkatumpag, apan mahimo nga maluwas ikaw karon pinaagi sa pagtoo sa Ginoong Jesu-Cristo nga imong bugtong manluluwas sama sa gihimo ni Rahab sa mitoo siya sa mga tugon sa maniniid. Ipakita ang imong pagtoo pinaagi sa pagsugid ug pagdawat kang Cristo nga imong bugtong manluluwas. Dayon makahimo na ikaw sa pagdala sa uban o sa imong panimalay ngadto sa kasi-gurohan diha kang Cristo Jesus sama sa gibuhat ni Rahab nga gidala ang iyang panimalay ngadto sa pagtoo ug naluwas silang tanan sa pagkalaglag.

SAG-ULOHON: “Wala ko ba ikaw sugo-a? Magmakusganon ka ug magmaisug; ayaw pagkahadlok ug dili ka magmaluya; kay si Jehovah nga imong Dios, magauban kanimo bisan asa ikaw paingon.” Josue 1:9.

#### PAGTULON-AN 13 — PAGATUBAGON

1. Kinsa ang nahimo nga pangulo sa mga Israelitas human si Moises namatay? \_\_\_\_\_ Josue 1:1,2.
2. Ngano nga si Josue man ang gipili? Deuteronomio 1:35,36.

3. Unsa ang tolo ka importante nga saad nga gisaad sa Dios kang

Josue? (1) Josue 1:3 \_\_\_\_\_

(2) Josue 1:5 \_\_\_\_\_

(3) Josue 1:8 \_\_\_\_\_

4. Ang kalampusan ni Josue nagasandig diha lamang sa \_\_\_\_\_

\_\_\_\_\_ (pagtrabaho, pagkamatimuman, maayo nga organization) Josue 1:8.

5. Tungod sa \_\_\_\_\_ ang mga paril ug kota sa Jerico natumpag (pagpakiggubat, pagtoo, pagpadayon).

6. Si Rahab naluwas tungod kay siya \_\_\_\_\_ (maayong babaye, dautang babaye, nagtuman sa kasugoan, may pagtoo). Hebreohanon 11:31).

7-8-9. Ang mga kasinatian sa mga nanagkinabuhi ilalum sa Panahon sa Grasya may sama ug kasinatian sa mga Israelitas sa daghan nga mga paagi. Susiha ang pipila ka mga bersikulo ug ihatag ang tinuod nga tubag.

(1) Ang mga Israelitas sa yuta sa Canaan nakadawat ug daghan kaayo nga mga gisaad nga panalangin. Kita usab adunay daghang mga panalangin gihatag kanato pinaagi sa \_\_\_\_\_ Efeso 1:6.

(2) Ang kaaway sa Israel mao ang mga dili diosnon nga mga katawhan sa Canaan. Ang atong kaaway mao ang batok sa \_\_\_\_\_ diha sa mga dapit sa kalangitan. Efeso 6:12

(3) Ang kadaugan sa Israel nagasandig lamang sa pagtoo ug pagtuman. Ang atong kadaugan nagasandig lamang sa pagdala sa \_\_\_\_\_ Efeso 6:13,17.

10. Isulat nga SINAG-ULO ang Josue 1:9.

---

---

---